

# 廣東歷代詩僧簡介(廿一)

慧光居士

李芬

李芬字莖九，番禺人，清初以詩鳴，後祝髮於海幢寺，僧名佚。著有二守堂稿，未見，海雲禪藻卷三，莖九所編纂。陳顥菴先生讀莖九詩絕句：愛人惟有羅浮月。醒世無如早晚鐘。剩却詩囊隨我去。餘生早備一枝筇。無聊山水詩中景。有限風流景裏詩。破籠年年殘筆墨。我寧枯坐佛低眉。

達津

達津字遠布，主法性寺，聯吟有詩，康熙四十一年壬午，法嗣願光輯爲法性寺唱和集並序之云。「法性寺原在訶林東北隅，乙卯冬十二月安達公徙遷，戎馬暫駐，訶林僧舍，所存十一焉爾。先師因寄跡郊西友人精舍，迨丙辰間遂卜築於此。其明年古法性復還僧居，是時方值募緣鳩工，修建文佛殿，惟土壁草創而已。戊午建韋馱殿，已未建簷蔔樓，甲子藩台郎公捐俸重修文佛殿，前後莊嚴，翬飛輪奐，由丙辰迄甲子，凡九年始獲落成。歲丁卯，宮允藕漁嚴公來粵，太史藥亭梁公相拉見過，樂其清淨，因題扁曰華嚴香海，嚴公書之，公本朝之以書名者也。自創建迄今，諸名賢相遇者必有唱和贈答，積成卷帙。丁丑秋周子冷泉至，盤桓累日，因出諸作謂之曰，盍爲我編輯之，付之梨棗，以垂不朽。周子曰諾。此寺之本末與茲集之緣起也。簷蔔樓東偏，頗餘隙地，乃建客廳一所，其前因蘭湖舊跡，廣而浚之，爲放生池，遇諸佛菩薩誕期放生，兼爲雅會之地，則先師已卯間經始也。先師開山於此，誠費心力焉。」是集久已失傳，民國二十五年胡毅生謝英陳大年重印，附入南華雜誌。

己卯閏七夕後一日集西郊簷蔔樓分韻得照字

闕寂一茅居。芳徑未曾掃。秋爽葉初落。鳥聲無人到。林泉雖幽僻。星斗能垂耀。羣公敢相邀。來車果可料。呼童汲泉歸。茶鑪黃葉燒。解衣挂松枝。虛閣同登眺。留歡對白雲。復此談玄要。徒御言旋去。揖送斜陽照。

陳顥菴先生讀遠布詩絕句：肅殺聲中古佛前。香花淨處是生天。寒鐘清磬消詩業。羣繞蒲團證舊禪。閒抱冰絃調梵曲。石橋低奏結知音。(樊傳芳句)禽魚揮手逍遙下。共向天高海濶尋。

願光

願光字心月，遠布和尚法嗣。住法性禪院。凌揚藻云，舊法性寺在訶林東北隅，康熙乙卯爲藩部戎卒借住，遠公遂移錫西郊結廬，仍曰法性。內有簷蔔樓、借甕堂，又浚蘭湖爲放生池。至心月，嘗與梁藥亭周乳峯李南樵諸詞人結社於此。而吳江潘稼堂，歸安沈簷山，武進毛匏村，江陰司紅暹，吳江張損持來粵，亦與往還，輯有蘭湖唱和集，其自著有蘭湖稿。

己卯閏七夕後一日集簷蔔樓分韻得禪字  
高木涼初動。銀潢鷓再填。前夕固嘉辰。詰朝挹羣賢。宮靴雜選至。赤舄亦聯翩。分曹入竹林。解衣誠自然。疏星列棋枰。流水鳴琴絃。或觀白鷺翔。或賦明河篇。或倚石樓風。或眺平疇煙。背北指秋山。雲斂芙蓉顛。面西向牂牁。竹箭飛迴漩。各各還藉草。促膝相周旋。良覲適彌日。辯論湧新泉。暢叙發幽情。獨愧懶殘禪。

端

州

六龍飛向極南方。誰料威儀見瘴鄉。共道乾坤開草昧。豈知日月不重光。崧臺北望山蒼遠。峽水東流客思長。鳥去鳥來雲影外。依然形勝滿殘陽。(梁藥亭云含蓄中懷抱無限覺黍

雜之作未免傷時)

送陳少菴之楚謁所知

粵國千山外。言揚楚水艸。送君出江口。黃葉滿津亭。樹色寒雲夢。秋聲落洞庭。故人一相見。吟眺九疑青。

陳顥菴先生讀心月詩絕句：峽水東流客思長。依然形勝滿殘陽。讀師慷慨端州詠。無限離離禾黍傷。法性清吟夜雨燈。海雲光燄熄何曾。明明如月琉璃下。尚有蘭湖一箇僧。

## 元 默

元默字敏言，一字葆菴，南海九江馮氏子，住光孝寺，惠仲孺學士視學廣南，與爲方外交，詩多唱酬，其操行可以想見。

九日同周乳峯諸子登簷蔔樓

頻年風雅集西園。九日誰能更杜門。凝露寒花堂徑滿。避人幽鳥背城翻。青迴危檻干霄嶂。紅掩流雲秋樹村。竹閣但能傾茗椀。何妨歸路傍黃昏。

次韻奉答蘭湖別後雨中相憶見寄

道疑非處且何能。天壤行孤皓首僧。過事懶將閒夢較。新篇勞爲遠人增。興深郊寺憐秋日。跡戀江林老澗藤。風雨重煩相問訊。宵分祇自偶松燈。

初春臥病蘭湖精舍答蒲園黃公見過

尙覺衣裳薄。寒仍減未多。憑湖憐瘦影。遠思託微波。梅易含煙放。庭難好客過。佳山倚前檻。歡笑更如何。

題蘭湖倚杖圖

倚杖胡爲者。茲情誰爾憐。雲樓新思外。秋草野人前。放眼寧無地。端居祇獨賢。亭陰移暇日。湖色迥遙天。

乙酉夏日集蘭湖觀池蓮分賦四首

近郭無茲勝。眞宜雅會類。沿湖散朱鷺。密座並詩人。電照朝暉薄。風迴午氣新。耶溪爭得擬。靜社日爲鄰。長夏懷深院。過逢豈偶然。湖寬新雨後。荷熟早秋前。波動風千葉。香分水一天。郊西記來往。於此最流連。停雲深一沼。此地卽東林。芳草忘遲暮。清時契夙心。文魚

西北戲。楊柳短長陰。豈易誇閒況。歡留同浩吟。微情同皎潔。卽事信忘機。星燭魚龍水。香涵鳧鷖磯。低回詩轉愜。客與興因依。徒訝江城別。居常意豈違。

心公借甕堂題壁

却笑煙霞世易知。蘭湖秋好恨歸遲。泉來遠澗驚三疊。檻入遙峯似九疑。靜對了忘雲出岫。分行殊愧鳥巢枝。尋常坦率多佳夜。賸偶西園月半規。

立冬前一日同諸公雅集蘭湖放生卽事

招邀豈必定林泉。語默翻令各洗然。盡興好秋仍社後。逼人新思又冬前。香池水滿通魚樂。寶樹雲深隱地偏。卽事相忘竟何許。訝看吟和已成編。

次韻奉答心兄早春見寄兼柬周冷泉

吳會歸來知幾春。詩歌頻寫物華新。衡茅共住翻離隔。添得須眉訝老人。島寺春來少過船。桃花晴去色彌鮮。白頭漁父欣相識。高詠知能達冷泉。

扶杖溪南多古樹。木棉紅處雜冬青。蘆中更有離騷客。一曲滄浪到遠汀。

懶去林間事轉餘。燈邊頻誦昨來書。風泉落石沉山響。清籟從空獨起予。

何曾瀑布擬香爐。漫遣蘭湖似鏡湖。只隔石門能幾許。雨中青靄入看無。

己丑上日曉起同蘭湖燈下酌百沸湯次元韻

簡易誰知是懶僧。避人休向碧雲層。竹窗泉熟驚風響。偶坐何孤達曙燈。新編漫興且同看。時覺春風已減寒。遠近溪山臨眺好。昨宵曾夢理漁竿。

陳顥菴先生讀敏言詩絕句。唱酬文酒惠仲孺。風雨故人梁藥亭。翰墨低徊訶子下。詩龕澄澈一燈青。法性聯吟興最高。能將情性變風騷(梁藥亭言)停雲篤愛東林侶。不受塵埃損一毛。

(未完)